



# BILTEN

## OPĆINE SREBRENİK



IZDAJE: OPĆINA SREBRENİK • BROJ: 28 • MJESEC: JUNI/LIPANJ 2009. • BILTEN JE BESPLATAN • TIRAŽ 500



SRETAN VAM 21. JUNI - DAN OPĆINE SREBRENİK

## ZNAČAJNI DATUMI

# Obilježen 15. april, Dan Armije RBiH

U okviru obilježavanja 15. aprila, Dana Armije RBiH, općinski načelnik Osman Suljagić i predsjedavajući OV-a Srebrenik Ibrahim Zukić, su organizovali svečani prijem, kojem su pored ratnog



*Sa svečanog prijema u kabinetu načelnika*

komandanta 21. srebreničke brigade Fazlić Abdurahmana, prisustvovali i predstavnici boračkih udruženja: Kadrić Salko, Bajrić Novalija, Zahirović Senada i Hasanović Mirsad, te predstavnici nadležne općinske službe za pitanja boraca. Prisutnima se, kratkim govorom, obratio općinski načelnik, čestitajući svima Dan armije R BiH, nakon čega je govorio o dosadašnjoj pomoći Općine boračkim kategorijama, istakavši da će se ista nastaviti i u budućnosti, a visina iste će ovisiti od sredstava u budžetu. Nakon razgovora i prisjećanja o prvim danima organizovanog otpora naroda srebreničkog kraja agresiji na BiH, delegacija Općine Srebrenik i srebreničkih boračkih udruženja je položila cvijeće i proučila fatihu za duše umrlih, na centralnom spomen-obilježju šehidima i poginulim borcima s područja ove općine. Obzirom da su se ranijih godina, povodom Dana Armije RBiH, održavali prigodni časovi historije, svečane akademije, na kojima je bilo prisutno na stotine posjetilaca, te bogat kulturno-umjetnički program, ovogodišnje obilježavanje je, i pored evidentne krize, previše skromno, a sve istinske patriote boli i činjenica što se ovom datumu, iz godine u godinu, posvećuje sve manja pažnje, iako je očito da je jačanjem Armije RBiH, jačao i položaj naše države. Za to snosimo svi odgovornost, a posebno predstavnici boračkih udruženja, kojima bi, kvalitetna organizacija proslava značajnih datuma iz naše odbrambeno -oslobodilačke



*Položeno je cvijeće i proučena fatiha na centralnom spomen-obilježju na Trgu. Alije Izetbegovića* borbe, trebao biti jedan od najznačajnijih zadataka. Uzimajući navedeno u obzir, općinski načelnik je zadužio šefa Službe za boračko-invalidsku zaštitu Slanjankić Razima, da ubuduće bude nosilac izrade programa obilježavanja i koordinator svih aktivnosti oko obilježavanja ovih značajnih datuma iz naše historije.

# Obilježen 9. maj, Dan pobjede nad fašizmom

Polaganjem cvijeća na spomen-obilježja poginulim borcima iz protekla dva rata s područja srebreničke općine i u Srebreniku je na prigodan način obilježen 9. maj, Dan pobjede nad fašizmom. U okviru



*Sa prijema povodom 9. maja,  
Dana pobjede nad fašizmom*

obilježavanja ovog datuma u kabinetu općinskog načelnika Osmana Suljagića održan je svečani prijem za predstavnike antifašističkih udruženja i boračkih organizacija s područja ove općine, a sutradan je održana i svečana sjednica Općinskog odbora Udruženja antifašista i boraca NOR-a Srebrenik. O ovom značajnom datumu učesnicima svečane sjednice govorio je Safet Ramić, predsjednik Općinskog odbora Udruženja antifašista i boraca NOR-a Srebrenik.

## SJEDNICE OPĆINSKOG VIJEĆA

### Izveštaj sa 5. sjednice Općinskog vijeća Srebrenik



*Sa 5. sjednice OV-a Srebrenik*

Na 5. sjednici OV-a Srebrenik, koja je održana u subotu 14.03.2009.godine, prihvaćen je Nacrt odluke o korištenju javnih površina, gdje bi ubuduće vlasnici ugostiteljskih i trgovinskih objekata za kvadratni metar ljetne bašte u Pješačkoj zoni plaćali 10 KM, za kioske 20 KM po metru kvadratnom, dok bi 100 KM mjesečno plaćali oni koji žele da postave pokretne objekte na točkovima. Ipak, o ovome pitanju sproved će se i javna rasprava, na kojoj će učestvovati i sami ugostitelji i trgovci, pa bi konačna odluka trebala da se donese krajem marta. Na sjednici je usvojen i Prijedlog odluke o pristupanju izradi Urbanističkog projekta «Sineks», s obzirom da vlasnici ovoga objekta i zemljišta uskoro namjeravaju započeti sa izgradnjom prodajno-poslovnog objekta. Naime, firma d.o.o «Marković» želi da izgradi prodajno-poslovni objekat koji nije u skladu sa važećim Regulacionom planom, pa će se i o ovome pitanju govoriti i na narednim sjednicama OV Srebrenik. Također, usvojen je i Prijedlog odluke o pristupanju izradi Urbanističkog projekta «SO 1 –Salamović» koji umjesto planirane stambeno-poslovne zgrade sa tri, žele izgraditi stambeno-poslovni objekat od šest spratova u ulici Vahida Ibrića. Također, vijećnici su prihvatili Odluku da Imšir Škahić i Samir Muratović postanu dio Komisije za koncesije Tuzlanskog kantona, posebno imajući u vidu sve jače aktivnosti u vezi toplifikacije Grada. Ipak, najviše diskusije utrošeno je za Nacrt programa zaštite okolice na području općine Srebrenik za 2009. godine, gdje je istaknuto da Srebrenik ima velikih problema sa čistoćom zraka, posebno u zimskom periodu, zbog čega bi se uskoro trebalo i moralo započeti sa procesom toplifikacije Centra i prigradskih naselja. Također, na ovoj sjednici OV-a Srebrenik, usvojene su i Informacije o stanju bezbjednosti na

području općine Srebrenik u 2008.godini, kao i Izveštaj o radu JU «Centar za socijalni rad» za 2008. godinu, dok je i prihvaćeno rješenje o imenovanju Etičke komisije.

### Budžet općine Srebrenik za 2009.g. oko 13,5 miliona KM

Na 6.sjednici Općinskog vijeća Srebrenik usvojen je budžet za 2009.godinu u visini od 13.494.970 KM. U odnosu na prošlu godinu budžet je veći za 12% te se u ovome momentu čini dosta nerealnim, što je priznao i sam predlagač, načelnik Općine Srebrenik, Osman Suljagić. Prvi čovjek Općine naglasio je kako će se pričekati sredina godine, odnosno deveti mjesec, nakon čega će biti poznato koliko će se morati rebalansirati prema dolje, s obzirom da je teško očekivati da se on i ostvari, jer je evidentno kako kriza sve pogađa pa i lokalni nivo vlasti. Na ovoj sjednici usvojen je Izveštaj o izvršenju budžeta za 2008.godinu u kojem je ostvaren suficit od 433.970 KM, na što vijećnici nisu imali nikakvu primjedbu. Također,



*Sa 6. sjednice OV-a Srebrenik*

usvojen je i Elaborat o popisu sredstava, obaveza i potraživanja do kraja 2008.godine. Vijećnici su bez rasprava usvojili i Odluku o prosječnoj konačnoj građevinskoj cijeni kvadratnog metra korisne stambene površine. Primjedbi nije bilo ni na Odluku o izgradnji transformatorske stanice u Tinji, dok je bilo žučne rasprave u vezi predstojeće izgradnje podvožnjaka kod Mulaahmetovića potoka. Naime, vlasnici zemljišta kroz koje treba da se izgradi ulica, smatraju da su oštećeni i da sve nije urađeno u skladu sa Zakonom, dok s druge strane u Izvršnoj vlasti smatraju da bi, zbog određenih opstrukcija, ovaj projekat mogao da se ne realizuje, jer su sredstva planirana u Direkciji cesta FBiH i ukoliko se uskoro ne krene u realizaciju projekta lako je moguće da se sredstva preusmjere za druge projekte. Vijećnici su usvojili i Program uređenja gradskog građevinskog zemljišta u 2009.godini, za šta bi se trebalo izdvojiti 4.269.082 KM, zatim Program izgradnje infrastrukture na području općine Srebrenik za šta su planirana 3.617.000 KM, a najviše u održavanje cesta, mostova i nasipa. Primjedbi nije bilo ni kada se usvajao Izveštaj o radu načelnika i općinskih službi u 2008.godini.

## Kvadratni metar ljetne bašte u Pješačkoj zoni 7 KM

Na 7. sjednici Općinskog vijeća Srebrenik, koja je održana 25.04.2009. godine, usvojena je Odluka o korištenju javnih površina, tako da će ugostitelji i trgovci za kvadratni metar u pješačkoj zoni plaćati 7 KM mjesečno za ljetnu baštu odnosno trgovački pult, a u ostalim dijelovima Centra po 5 KM u prvoj, odnosno 4



Sa 7. sjednice OV-a Srebrenik

KM u drugoj zoni. Usvojena je i Odluka o izboru lica za obavljanje zajedničke komunalne potrošnje, a i ove godine su poslovi iz komunalnih oblasti povjereni JKP «9.septembar». Vijećnici su odobrili i 101.500 KM za nepredviđene troškove u naselju Neum, kako bi se priveli kraju infrastrukturni projekti, s obzirom da je u pitanju naselje koje je blizu Centra grada. S obzirom da su u pitanju naknadni troškovi koji su manji od 50%, načelnik Općine Osman Suljagić je kazao kako je to po Zakonu o javnim nabavkama dozvoljeno, premda su vijećnici SDP-a imali primjedbe da se u buduće vrše veće kontrole i da ne dolazi do ovakvih nepredviđenih radova. Utvrđeno je da se za Dan općine, 21. juni dodijele 3 Plakete, 4 Povelje, 8 Zahvalnica i 5 novčanih nagrada, dok su članovima Komisije za procjenu nekretnina smanjene naknade na 250 KM za članove odnosno 300 KM za predsjednika komisije. Vijećnici su primjedbovali na izvještaj prethodne Komisije za procjenu nekretnina s obzirom da je bio štur i kratak, no predsjednik Svjetlan Bešić je kazao kako se detaljniji podaci mogu dobiti u Poreznoj upravi, te da ova komisija na to nema pravo. Bez većih rasprava usvojeni su Program zaštite životne okoline kao i Strategija razvoja Tuzlanskog kantona za period 2008-2013. godina. Dogovoreno je da uz predstavnike općinske Službe za budžet, nadzor i poduzetništvo ovu komisiju predstavlja i po jedan član OV-a iz svake političke partije, te predstavnici Udruženja privrednika i poljoprivrednika. U drugom dijelu su na Dnevnom redu bili izvještaji javnih ustanova, kao i općinskog pravobranilaštva, te Vatrogasnog društva, Narodnog univerziteta, Boračkih organizacija..., koji su, uz kraću raspravu, i usvojeni.

## Ugostitelji moraju ugraditi limitatore za muziku

Ugostitelji u prvoj zoni Srebrenika morat će u roku od 15 dana ugraditi limitatore za ograničavanje jačine muzike, dok će za one vlasnike koji ne budu poštovali radno vrijeme, biti izrečene novčane kazne u rasponu od 500 do 2.000 KM, zaključak je sa 8. sjednice Općinskog vijeća Srebrenik, koja je održana u subotu 30.maja. Također, usvojene su Odluke o dodjeli priznanja i stimulativnih mjera prema kojima će se za Dan općine dodijeliti četiri plakete, pet povelja, osam zahvalnica, sedam novčanih nagrada te deset zahvalnica, koje dodjeljuje općinski načelnik. Bez većih rasprava usvojene su odluke o usvajanju urbanističkih projekata «Sineks» kao i «Katoličke kapele», koja bi se trebala graditi u blizini Željezničke stanice u ulici «Žrtava genocida u Srebrenici», dok vijećnici nisu mnogo ni polemicali kada je u pitanju preuzimanje duga MZ-a u iznosu od od 45.744 KM. Izvještaj o radu JU «Dom zdravlja» za 2008. godinu također je uglavnom dobio pozitivne kritike, dok su pojedini vijećnici konstatovali da se treba osnovati Savjet za zdravstvenu zaštitu, ugraditi lift za invalide te omogućiti da građani mogu koristiti usluge porodične medicine i nakon 16 sati, kada završe sa radnim vremenom u svojim preduzećima. Mnogo rasprave bilo je u vezi izvještaja o radu JP «Vodovod i kanalizacija», koji je na kraju i usvojen. Poseban akcenat stavljen je na upravljanje lokalnim vodovodima, gdje je konstatovano da ovo preduzeće ima godišnje gubitke na njima i do 50.000 KM, zbog čega je potrebno ugraditi uređaje za gubitke vode, dok su vijećnici energično odbili bilo kakva nova poskupljenja vode, koja su planirali u menadžmentu ovog preduzeća. Bilo je dosta polemike oko broja uposlenika i tehničke opremljenosti preduzeća, a sugerisano je da se uradi detaljna analiza održivosti preduzeća u postojećem omjeru vlasništva nad kapitalom (51% vlasništvo Općine i 49% vlasništvo dioničara), koja bi se razmatrala na jednoj od narednih sjednica OV-a. S druge strane izvještaj o radu za 2008. godinu JP «9.septembar» dobio je pozitivne ocjene, s tim, uzimajući u da je sugerisano menadžmentu da se u narednom periodu poveća broj korisnika usluge organizovanog odvoza smeća, da se iznađe mogućnost za bolju tehničku opremljenost preduzeća, da se bolje plate oni koji su direktno na poslovima održavanja čistoće te da se ulice redovnije peru u noćnim satima, a posebno «Pješačka zona», koja je «srce» Srebrenika. Zbog nepotpunih informacija u vezi finansijskog dijela, te neprisustva odgovornih lica, izvještaj o radu Sportskog saveza je vraćen na doradu, uz kritike pojedinih vijećnika na stagnaciju sporta na području općine Srebrenik, kojem se godišnje izdvaja iz budžeta 150-200 hiljada maraka.

## SARADNJA I POSJETE

Saradnja Vukovarsko-Srijemske  
županije i Općine Srebrenik

Dana 09.03.2009. godine, delegacija općine Srebrenik, predvođena općinskim načelnikom Suljagić Osmanom, upriličila je posjetu gradu Vinkovcima u R. Hrvatskoj. Razlog za posjetu je uspostavljanje zajedničkih nastupa na projektima prekogranične



*Sa sastanka u poglavarstvu Grada Vinkovaca*

saradnje koje podržava EU i korištenje IPA fondova. Sa našom delegacijom je putovao i konzul RH u BiH gosp. Josip Juras, veliki prijatelj Srebrenika i BiH, a pored navedenih delegaciju su sačinjavali: Mirza Ordagić, Mato Jurić, Jakub Suljkanović, Ibrahim Smajlović, Senaid Buljubašić i Esad Dedić. Naša delegacija je primljena u zgradi poglavarstva Grada Vinkovaca, gdje im je domaćin bio gradonačelnik Vinkovaca, gosp. Mladen Karlić sa svojim saradnicima, a dodatnu težinu ovom sastanku je doprinijelo i prisustvo Župana Vukovarsko-Srijemske županije, gosp. Galić Bože. Na radnom sastanku u poglavarstvu, uz prisustvo brojnih medija, govorilo se o iskustvima Grada Vinkovaca u određenim infrastrukturnim projektima koje su oni već završili ili su projekti u toku (dvije industrijske zone, rekonstrukcija vodovodne i kanalizacione mreže, rekonstrukcija 50 ulica u gradu, izgradnja jednog od pet najmodernijih prečištača otpadnih voda u Hrvatskoj). Grad Vinkovci je iz pristupnih fondova EU povukao značajna sredstva kojima je finansirao i krupnije projekte infrastrukturne izgradnje (npr. za poslovnu zonu 1,5 milion eura). Konstatovano je da pozitivna iskustva Grada Vinkovaca mogu pomoći i nama u povlačenju sredstava iz pristupnih fondova EU, a i naši zajednički projekti iz oblasti ekologije, turizma, lova, ribolova, planinarstva, kao i zaštite riječnih tokova u okviru slivova rijeke Save, mogu dati pozitivne rezultate za obje strane. Dogovarana je saradnja na privrednom i kulturnom polju (predstavljene su kulturne manifestacije



*Zajednička fotografija pored gradske fontane*

„OGUS“, „Dani povelje“ kao i o srebrenička Galerija). Mato Jurić je istakao mogućnost saradnje u oblasti turizma, govoreći o našem Starom gradu i planini Majeveci, kao potencijalno vrlo interesantnim turističkim odredištima. Konzul RH u BiH, gosp. Josip Juras pozdravio je ovu posjetu i uspostavljene kontakte, istakavši želju da se oni nastave na obostrano zadovoljstvo i korist. Općinski načelnik Osman Suljagić se na kraju domaćinima zahvalio na srdačnom prijemu i pozvao ih u uzvratnu posjetu našem gradu i općini. Ista je uslijedila dana 06.04.2009.godine, kada su predstavnici Vukovarsko-Srijemske županije, prevođeni županom Božom Galićem, uzvratili posjetu Općini Srebrenik. -Uskoro se potpisuju projekti za prekograničnu saradnju prema IPA fondovima EU, a mislimo da ima zajedničkih projekata koje bismo mogli iskoristiti, na dobrobit i jednog i drugog prostora, kazao je župan Galić. Gradonačelnik Vinkovaca Mladen Karlić, također nije krio zadovoljstvo ovom posjetom Općini Srebrenik, te je tom prilikom kazao: -Jako puno ljudi sa područja općine Srebrenik je doselilo u Vinkovce i oni već dugo žive u Vukovarsko-Srijemskoj županiji. Također, i ova saradnja bi ubuduće trebala biti sve bolja, a mi, izuzev Srebrenika, imamo još desetak gradova sa kojima tijesno saradujemo. Ovdje će se svakako saradnja ogledati u oblasti turizma, kako kontinentalnog, tako i planinskog i lovnog, u kojem mi imamo dosta iskustva. Posebno nas raduje saradnja privrednika, a prva saradnja će se već vidjeti u jesen na sajmu u Vinkovcima. Mirza Ordagić-predsjednik Udruženja privrednika općine Srebrenik, nakon sastanka ovih dviju delegacija je rekao: -Gostima iz Vinkovaca smo predložili plan izgradnje poslovno-industrijske zone. Trenutno očekujemo odgovor sa viših nivoa vlasti da bi zemlja mogla preći u vlasništvo Općine Srebrenik, nakon čega ćemo moći predstaviti industrijsko-poslovnu zonu, te konkretno ponuditi hrvatskim kompanijama otvaranje pogona u Srebreniku. Načelnik Općine Srebrenik Osman Suljagić, uvjeren je kako će saradnja biti plodonosna, te je kazao: -Vjerujem kako ćemo u ovim oblastima pronaći zajednički interes, što bi moglo pojačati saradnju između ove dvije regije. Mi ćemo formirati timove za oblasti privrede, kulture i sporta. Po raspisivanju konkursa iz EU fondova, mi ćemo aplicirati na te tendere, a već u službama Općine imamo urađene neke projekte i samo čekamo da predamo aplikacije.

## INFRASTRUKTURA

# Intenzivno se izvode radovi na korićenju rijeke Tinje

Do sada smo više puta pisali da je za korićenje rijeke Tinje i Slanjanske rijeke, do sada utrošeno više od 800.000 KM. Nakon što je urađen i revidovan projekat nastavka korićenja rijeke Tinje od ušća Slanjanske rijeke u rijeku Tinju prema mostu u naselju Kiseljak, u ukupnoj dužini od preko 1km, istim se apliciralo kod Agencije «Vodno područje Slivovi rijeke Save» Sarajevo za potrebna sredstva. U veoma jakoj konkurenciji smo uspjeli dobiti novih 1,28 miliona KM za navedene radove i nakon okončanja tenderske procedure za izbor najpovoljnijeg izvođača radova je



*Korito rijeke Tinje kod Željezničke stanice* izbora najpovoljnijeg izvođača radova, i isti će se, ukoliko se pronađu dodatna sredstva u iznosu od preko 60.000 KM, izvesti paralelno sa ovim radovima. Na taj način će Općina Srebrenik u svega par godina uspjeti izvršiti korićenje rijeke Tinje i Slanjanske rijeke u



***Korićenje rijeke Tinje prema mostu u Kiseljaku***

izabrana firma «Reweus» d.o.o. Lukavac. Kako saznajemo od Ibrahima Smajlovića, stručnog savjetnika za investicije i razvoj Općine Srebrenik, radovi uveliko teku i isti su se trebali okončati do kraja aprila 2009 g., ali će se isti, zbog loših vremenskih prilika, završiti u narednih nekoliko mjeseci. U međuvremenu je urađena i revidovana projektna dokumentacija za izgradnju pješačkog mosta na Kiseljaku, te obavljena procedura

dužini oko 3 kilometra, čime se osim zaštite od poplava gradskog središta i smanjenja eventualnih šteta koje mogu od nje nastati, stvaraju preduslovi za razvoj predviđene zone sporta i razonode, koja predviđa postavljanje brane, izgradnju vještačke akumulacije za kupanje i pecanje, izgradnju igrališta za fudbal, košarku i tenis, kao i izgradnju osvijetljene pješačke zone te svih ostalih pratećih sadržaja.


# Asfaltirana ulica Tuzlanskog odreda od TC Bingo do pružnog prelaza

Dana 08. i 09. 04 2009.godine, asfaltiranjem trotoara i ulice Tuzlanskog odreda, privedeni su kraju



***Ulica Tuzlanskog odreda prije...***

svi radovi na rekonstrukciji ove veoma važne saobraćajnice u gradu Srebreniku, čime je, i pored



***...i poslije asfaltiranja***

sveopće krize i recesije, nastavljen trend uspješnih završetaka već započetih infrastrukturnih projekata u Srebreniku. Kako je poznato krajem septembra 2008. godine, radnici firme «Road-ing» d.o.o. Gračanica, prvim mjerenjima trase, započeli su radove na rekon-



strukciji ulice Tuzlanskog odreda u dužini od oko 500m, od tržnog centra Bingo do raskrsnice za Kiseljak, u gradskom području Srebrenika. -Vrijednost navedenih radova, a urađeni su zemljani radovi, izvršena je odvodnja površinskih voda, urađeni trotoari i potporni zidovi..., je oko 577.000 KM, a obzirom da je u pitanju zona gradskog građevinskog zemljišta, kompletni radovi su finansirani iz sredstava rente iz budžeta općine Srebrenik. Sredinom 2009. godine, sa početkom građevinske sezone, trebalo bi se pristupiti i rekonstrukciji raskrsnice sa mag. putem kod tržnog centra «Bingo», naravno ukoliko se u međuvremenu

riješe imovinski odnosi sa vlasnicima zemljišta. Paralelno sa ovim radovima završeni su i radovi na izradi podzemne instalacije javne rasvjete, vrijedni nekoliko hiljada KM, koja je postavljena duž trotoara navedene ulice, tako da će tek po realizaciji i ovog projekta, ova ulica biti jedna od najljepših u Srebreniku. Za pohvalu je i angažman većine mještana, koji su, uz protuuslugu da im se urade novi

temelji i coklo za ogradu, dopustili proširenje ulice za 1 do 2 metra u njihovo zemljište, tako da su mještani ove ulice, osim šireg puta dobili i dosta kvalitetne trotoare, što bi trebalo povećati sigurnost pješaka - ističe općinski načelnik Osman Suljagić.

## PROJEKTI

# Općina Srebrenik u UNDP-ovom projektu integriranog lokalnog razvoja

Nedavno je općinski načelnik Osman Suljagić, u ime u Općine Srebrenik, potpisao u Sarajevu Memorandum o razumijevanju s predstavnicima UNDP-ovog projekta pod nazivom Integrirani lokalni razvoj (ILDLP). Općina Srebrenik jedna je od 24 odabra-



*Sa UNDP-ovog sastanka u Tuzli*

ne općine iz BiH u kojima će se implementirati ILDP. Cilj ovog projekta je kreiranje razvojnih strategija na lokalnom nivou u skladu sa EU standardima. Time će općine biti osposobljene za uspješnije privlačenje predpristupnih fondova Europske unije. Općinama će biti pružena stručna, tehnička i financijska podrška u provođenju prioritarnih projekata koji proizlaze iz razvojnih strategija, te pomoć u izradi novih strategija razvoja, a čiji je prvenstveni cilj unapređenje kvalitete života u lokalnim zajednicama. Prvi regionalni sastanak općina sa prostora sjeveroistočne BiH (Odžak, Orašje, Šamac, Srebrenik, Osmaci, Kladanj, Gračanica, i Tuzla), sa ciljem predstavljanja procesa za izradu Strategije razvoja općina, je održan dana 04.06.2009. godine, u Kristalnoj sali Hotela Tuzla. Regionalni sastanak je organizovala međunarodna organizacija UNDP Sarajevo, u saradnji sa Općinom Tuzla. Prisutni su bili predstavnici mjesnih zajednica, vladinog, nevla-

dinog i biznis sektora, te udruženja mladih. Ovaj sastanak je prvi korak u iniciranju integralnog i participativnog procesa planiranja lokalnog razvoja u nabrojanim općinama, a u okviru ILDP-a. Prema riječima Marine Dimove (ILDLP projekt menadžer) sa njihovim partnerima, 24 općine iz Bosne i Hercegovine, pokušat će napraviti novu metodologiju za planiranje lokalnog razvoja. Očekuje se da će novi Projekat biti standardizovan i institucionalizovan, radi boljeg efekta kada je u pitanju unapređenje lokalnog razvoja. U naredne dvije godine će općinama pružiti podršku u vidu kreditiranja, a sam Projekat je vrijedan 3 miliona američkih dolara, koje je obezbijedila SDC (Švedska agencija za razvoj i saradnju). Posebna pažnja planira se usmjeriti na jačanje partnerstva između općinske uprave i civilnog društva. Ovaj svojevrsni vodič za općine

kojeg planiraju izraditi, iako je naša Općina nešto slično već uradila sa OSCE-om, prema riječima načelnika Općine Srebrenik Osmana Suljagića, dolazi u pravo vrijeme. Naime, u našoj Općini je pri kraju realizacija stare strategije i uskoro počinjemo izradu nove, tako da će se sa uključenjem svih aktera u razvoju lokalne

zajednice, moći ostvariti primarna vizija Projekta integralnog razvoja, a to je usaglašavanje, izrada i primjena standardizirane metode za planiranje lokalnog razvoja. U ovom dijelu imamo dosta iskustva, jer je tako rađena i još uvijek važeća Strategija razvoja općine Srebrenik od 2005. - 2010. godine, za koju smo između ostalog nagrađeni Bikon statusom u temi Efikasno strateško planiranje 2006.godine, ali pomoć eksperata je uvijek poželjna. Kao i prilikom izrade prošle Strategije razvoja formiraće se tim koji će činiti stručni ljudi iz administracije općine Srebrenik, međunarodni i domaći eksperti te predstavnici biznisa, civilnog društva i nevladinog sektora. Da je općina Srebrenik ozbiljno prišla ovom poslu svjedoči brojna delegacija na ovom sastanku, u kojoj su pored načelnika Suljagića i njegovih najbližih saradnika bili Jurić Mato-vlasnik SRC i Motela «Orion» i Ordagić Mirza- predsjednik Udruženja privrednika općine Srebrenik.

## PRIVREDA

### Islamska razvojna banka pomaže projekte MSS i Doma zdravlja Srebrenik?

Predstavnici Islamske razvojne banke iz Saudijske Arabije, koji su krajem marta posjetili Općinu Srebrenik, istakli su kako su spremni pružiti finansijsku pomoć u izgradnji Gimnazije i završetku Doma zdravlja u Srebreniku i to sa blizu 300.000 američkih dolara, što je oko 450.000 KM. Eksperte te banke je u svom




*Sa sastanka sa predstavnicima Islamske razvojne banke u kabinetu općinskog načelnika*

kabinetu primio Općinski načelnik Osman Suljagić, a sastanku su prisustvovali i predsjedavajući Općinskog vijeća dr. Ibrahim Zukić, direktori Doma zdravlja i MSS, te predsjednik Medžlisa IZ Srebrenik, Mevludin Joldić, dok je sa Arapima u Srebrenik došao i muftija tuzlanski, Husejn ef. Kavazović. Naime, Islamska razvojna banka ima jedan Program, koji ima za cilj da se poboljša ekonomski razvoj zemalja istočne Evrope, među kojima se nalazi i Bosna i Hercegovina, a posebno u oblasti zdravstva i obrazovanja, i to u dijelu infrastrukture. Kako su kazali iz Islamske razvojne banke, ova pomoć sastoji se u izgradnji zgrade i opremanju enterijera, ali da bi do iste došlo potrebno je imati kvalitetne i opravdane projekte, te dobiti odobrenje članova Odbora ove banke u Saudijskoj Arabiji. Naglašeno je kako je BiH već iskoristila mnogo kredita od ove banke, ali da ima još sredstava koja se mogu iskoristiti te da su ona ograničena. Dom zdravlja iz Srebrenika je prema riječima direktorice dr. Senade Kovač, aplicirao za 80.000 dolara koji bi se utrošili za dovršetak jedne lamele potkrovlja veličine 300 kvadratnih metara, u koji bi se smjestio mamograf, pomoću kojeg se vrši rano otkrivanje raka dojke, a predstavljen je i projekat nabavke specijalnog sanitetskog vozila sa opremom za reanimaciju. S druge strane za 200.000 američkih dolara aplicirala je i

Mješovita srednja škola Srebrenik, u čijem se sklopu nalazi i Gimnazija, a već odavno zbog nedovoljnog prostora postoji potreba za izgradnjom novog objekta škole. Proračunska vrijednost objekta Gimnazije je oko 3 miliona KM, a ovih 200.000 dolara bila bi sjajna finansijska injekcija, koja bi, ukoliko do iste uopće i dođe, omogućila skori početak radova na izgradnji navedenog objekta. Menadžment ove dvije ustanove naknadno je popunio, preveo na arapski jezik i proslijedio u Saudijsku Arabiju aplikaciju, u kojoj je detaljno predstavio projekte sa pokazateljima opravdanosti istih.

### Posao za novih 25 radnika

Uprkos recesiji i globalnoj ekonomskoj krizi, Fabrika konfekcije «Kuzum City» Srebrenik uspješno stvara pretpostavke za zapošljavanje novih radnika. U ovoj izvozno orijentisanoj firmi trenutno je zaposleno 55 radnika, a nedavno je iskazan interes za povećanje broja uposlenih za skoro 50 procenata. Naime, ova firma je tražila da se, nakon obuke, 25 nezaposlenih lica s evidencije Biroa za zapošljavanje Srebrenik, prime u stalni radni odnos. Kako je istakao Sead Dadanović, direktor ove firme, na sastanku s predstavnicima Biroa za zapošljavanje i zainteresiranim nezaposlenim licima, «Kuzum City» većinu HTZ opreme, sportske odjeće i ostale konfekcije izvozi na tržište Italije, Austrije i Njemačke. Kupcima u ovim evropskim državama, ističe Dadanović, u ovoj godini isporučit će robu u vrijednosti



*Potencijalne uposlenice u obilasku pogona firme*

od oko 2 miliona KM, a ohrabruje i činjenica da već imaju potpisane ugovore i s nekoliko domaćih firmi u isporuci HTZ opreme u vrijednosti od 200.000 KM. Međutim iako je recesija u punom zamahu i u našoj zemlji, te iako je sve više nezaposlenih lica, od pozvanih 25 lica na informativni razgovor i obilazak pogona i procesa proizvodnje, odazvalo se tek njih 15. Da li je razlog što je visina plate u odnosu na traženi radni angažman, prema izjavi nekih od potencijalnih uposlenika, neadekvatna ili je u pitanju nešto drugo, pokazaće vrijeme, ali ovaj primjer zaslužuje svaku pohvalu, jer u «moru otpuštanja» nuditi posao na neodređeno radno vrijeme, za 25 lica je veliki uspjeh.

## PANORAMA

### Uskoro spomen-obilježje u Ljenobudu

U ponedjeljak, 20.04.2009. godine, svečano su otpočeli radovi na izgradnji spomen parka i spomen obilježja u M.Z. Ljenobud. Nakon nekoliko pokušaja i neuspjeha u aktivnostima oko izgradnje ovog spomen



*Početak radova na izgradnji spomen obilježja i spomen parka u Ljenobudu*

obilježja, a koja su trajala skoro deceniju, Vijeće M.Z. je konačno uspjelo smoci snage i prevladati sve nesuglasice, te krenuti u realizaciju ovog projekta. Početkom 2008. godine urađen je idejni i izvedbeni projekat, pribavljena građevinska i urbanistička saglasnost, a početkom 2009. godine je obavljen izbor najpovoljnijeg ponuđača po konkurentskom zahtjevu, na kojem je pobijedila građevinska firma „REALGRAD“ d.o.o. Cerik, Brčko D.C. Ista firma je, prema riječima direktora i vlasnika firme, dipl. arh. Gutić Nedžada, do momenta pripreme ovog biltena, izvela gotovo sve radove, a privode se kraju i radovi na postavljanju kamena na spomen obilježju. -Ovaj značajan projekat, koji je dug svih građana ove




*Trenutno se postavlja kamen na spomen obilježje MZ-e prema šehidima i poginulim borcima iz ovog naselja, je podržan od strane Kantonalnog ministarstva*

za boračka pitanja u iznosu od 7.000 KM, kao i općine Srebrenik, koja je izdvojila 8.000 KM. Vrijednost projekta je 38.000 KM, a osim novčanih sredstava od strane građana ove MZ-e priloge su dali i brojni donatori sa područja naše općine. Svečano otvaranje novoizgrađenog objekta spomen parka i spomen obilježja predviđeno je u okviru obilježavanja 21. juna - Dana općine Srebrenik-ističe Esad Dedić, predsjednik Građevinskog odbora za izgradnju spomen obilježja i spomen parka u Ljenobudu.

### Mladi Čehaja uredili sportski poligon

Početkom novembra 2008.g., radnici firme «Bašanović» d.o.o. Lukavac su asfaltirali sportski poligon u Čehajama, nakon čega su kompletno zatvorili poligon sa svih strana metalnom ogradom visine 4m i plastificiranom žicom, kako se ne bi oštetila fasada i prozori obližnje područne škole i spomen-obilježje u Čehajama. Za navedeni poligon općina Srebrenik je iz budžeta izdvojila oko 30.000 KM. Međutim zbog redovnih sportskih aktivnosti, zbog udaraca lopte, došlo je do oštećenja plastificirane žice, tako da su nedavno



mladi Čehaja, vođeni od strane Ahmetović Fahrudina, člana Vijeća MZ Čehaje, pristupili sanaciji oštećenja te nabavci potrebne sportske opreme i rekvizita. Zahvaljujući firmama «Sančo»d.o.o i «Dom Smreka» d.o.o. nabavljene su mreže, donacijama mještana Čehaja i dr. firmi nabavljena je farba, metalni profili te potreban repromaterijal, dok su sami mladi brojnim




**Sportski poligon u Čehajama**

satima dobrovoljnog rada, sve to postavili, zavarili, ofarbali i na kraju nabavili i postavili savremene drvene golove. Ukupna investicija se kreće oko 1200 KM.

## KULTURA

## Prilog o Gradini osvojio nagradu na sajmu turizma u Trebinju

U Trebinju, u periodu od 27. do 29. 03.2009.godine, u organizaciji preduzeća Sajamski grad, održan je 4. međunarodni sajam turizma ugostiteljstva i trgovine pod nazivom «Mediterranski dani 2009». Osim izložbenog dijela, održan je edukativni i takmičarski



### Gradina-neiskorišteni turistički potencijal

program, a organizirana je i konferencija «Putevima vina» i međunarodno takmičenje proizvođača vina i rakije. U toku Sajma priređeni su brojni okrugli stolovi dok je poseban segment sajma posvećen promociji knjiga i video spotova, vezanih za promociju domaćeg turizma, te drugi kulturni sadržaji, kazala je Ljiljana Čičković, direktor preduzeća Sajamski grad. Ono što je za nas bitno, je da je na istom novinarke RTRS Biljana Radić osvojila srebrnu plaketu-nagradu za novinarsku priču, za prilog o našem starom gradu Gradini u emisiji «Turizam plus». Iz telefonskog razgovora sa ovom novinarom, saznali smo da su njen prilog kao i bezvremenska ljepota Gradine, naišli na izuzetan prijem učesnika sajma, što još jednom potvrđuje da imamo izuzetno vrijedan kulturno-historijski spomenik, čije mogućnosti, nažalost, još nisu adekvatno iskorištene.

## Otvorena likovna kolonija "Majejica 2009"

Na privatnom posjedu Svjetlana Bešića na obroncima planine Majevice, dana 08.06.2009.g. otvorena je likovna kolonija »Majejica 2009«, koja će trajati sedam dana. Riječ je kulturnom događaju koji je privukao desetak likovnih stvaralaca iz cijele BiH. Na otvaranju manifestacije govorio je profesor Bosanskog jezika, Sadil Mehmedović, koji je goste upoznao s historijom Srebrenika, naglasivši kako je „Srebrenik oduvijek bio blago bosanskog kraljevstva, te da je bio glavni grad Usore, u kojem je živio i kralj Tvrtko kao i njegov otac“. Potom se prisutnima obratio Mehmed Pargan, predstavnik „Bosanske medijske grupe“ i novinar „Slobodne Bosne“, koji je između ostalog kazao



### Sa otvorenja likovne kolonije «Majejica 2009»

„kako je domaćin uspio da spoji umjetnost i prirodu na ovim prelijepim proplancima Majevice“. Gostima se obratio i domaćin, Svjetlan Bešić, gdje se zahvalio svima onima koji su uveličali ovu kulturnu manifestaciju naglasivši „kako je došlo vrijeme da se polako



Likovnu koloniju je otvorio dr. Hašim Muharemović povlačimo u prirodu, koja nam nudi mir i spokoj, jer smo u gradu svi izloženi prevelikom stresu“. Na kraju je ovu likovnu koloniju „Majejica 2009“ otvorio doktor Hašim Muharemović rekavši „kako se prelijepo osjeća



Svjetlan Bešić-domaćin likovne kolonije na Majejici zbog toga što je Srebrenik opet postao likovni centar BiH, a što je i najava OGUS-a“. Ovaj kulturni događaj uveličali su i načelnik Općine Srebrenik, Osman Suljagić i Faruk Vikalo, ministar za rad i socijalnu politiku u Vladi TK.

## KULTURA

# Uspješan nastup Alternativnog teatra u Velenju, R. Slovenija

Krajem novembra 2008. godine ostvareni su prvi kontakti sa "Bošnjačkim kulturnim društvom" iz Velenja, R. Slovenija i "Festivalom-Velenje", koji su vlasnici dvije sale u Velenju, nakon čega je dogovoreno



*Sa prvog nastupa u Velenju, R. Slovenija*

gostovanje Alternativnog teatra Srebrenik u ovom gradu. Osim intenzivnih četveromjesečnih priprema

### Nastup AT-a je dobio pozitivne kritike novinara

"Došlo je malo, amatersko pozorište, iz malog Srebrenika, a ustvari to su bile samo naše predrasude; to je bio veliki teatar, veliki nastup iz velikog grada, ma koliki on bio, pored ovakvih umjetnika on je Veliki...i napravili su ovdje veliki događaj, hvala im na tome, ovo građani Velenja odavno nisu vidjeli..." komentar je slovenskog novinara za TV Sloveniju.

bilo je potrebno i obezbijediti vize za svih 35 putnika-članova "AT"-a, sale, prevoz, prenoćište za sve njih, dvojezične plakate, afiše, prospekte te akreditacije i hranu. Naporan rad svih na kraju je proizveo i rezultat. Naime na prvom nastupu, u sali "Centar Nova" u Velenju, se okupilo preko 500 posjetilaca, što porijeklom iz BiH, što slovenskih građana. Izvrstan nastup "AT"-a, pod nazivom »Folklorno-dramski program«, koji je trajao 2,5 sata, oduševio je brojne posjetioce. Te večeri, u nedjelju 22.03.2009. godine, "AT" Srebrenik je odigrao svoju najgledaniju predstavu "Sulejman Suljo treći", kombinovanu sa čak 10 koreografija "Folklornog ansambla AT-a" i pjesmama prof. muzike Mirze Sitarevića. O kakvom ozbiljnom nastupu se radi, vidi se iz toga što je u nastupima predstavljeno čak 59 kostima "AT"-a, makedonskih, mađarskih kao i svih naroda BiH. Prije nastupa predsjednik "AT" -a Fikret Mujkić - Čipo se obratio

prisutnima sa riječima dobrodošlice, prenijevši građanima Velenja pozdrave svih građana Srebrenika, kao i pozdrave općinskog načelnika Osmana Suljagića, najvećeg sponzora ovog gostovanja, što je u sali izaz-



*Sa predstave «Ko je državni lopov?»*

valo oduševljenje prisutnih, od kojih su mnogi iz Srebrenika. Nastup je snimala državna TV Slovenija-za koju je nekoliko članova "AT"-a dalo i intervju. Na njihovim vijestima i web portalima nakon nastupa su osvanule samo riječi hvale. Iduće večeri je izvedena komedija «Ko je državni lopov?» gdje su pored Mujkića, koji je na sceni već 23 godine, veoma uspješno glumila tri tinejdžera od 15, 17 i 19 godina-Emina Moranjkić, Džemal Ordagić i Amir Džanić. Ovaj nastup je pokazao da je "AT" Srebrenik izrastao u respektabilno pozorište, koje je u stanju da pravi, organizuje i izvodi kulturne programe i predstave ne samo u BiH, nego i u drugim državama, i to dosta uspješno.

# Lejla Zahirović, pobjednica festivala "Djeca pjevaju hitove"

U organizaciji Kulturno-umjetničkog društva «Mehmed Ibrahimović» Srebrenik, sredinom aprila 2009.g., u velikoj sali srebreničkog Doma kulture



*Nastup Lejle Zahirović*

održan je Osmi festival narodne muzike «Djeca pjevaju hitove». Nastupilo je 13 takmičara iz srebreničkih osnovnih škola, a odlukom stručnog žirija, pobjednica ovog tradicionalnog festivala je Lejla Zahirović, na drugom mjestu je Eldina Koničanin, dok je na trećem mjestu Azem Šerifović. Svi takmičari dobili su zahvalnice, a najboljima je Safet Smajić, predsjednik KUD-a «Mehmed Ibrahimović», uručio prigodne nagade.

## PANORAMA

### NVO "Link" Srebrenik uređuje gradski park



*Učenici su okrečili i očistili  
spomen-kosturnicu*

Omladinska nevladina organizacija «Link» Srebrenik realizirala je projekt čišćenja i uređenja gradskog parka u centru Srebrenika. Na pravoj omladinskoj radnoj akciji učestvovalo je oko 20 volontera ove nevladine organizacije, uglavnom učenika srednjih škola, koji su detaljno očistili gradski park i zasadili veći broj sadnica ukrasnog drveća. Nabavili su i postavili nekoliko klupa, a detaljno su očistili i okrečili spomen-kosturnicu poginulim antifašistima u toku Drugog svjetskog rata. –«Cilj nam je bio da damo bar mali doprinos uljepšanju našeg grada, ali i da podstaknemo volonterski rad mladih koji, zbog nedostatka adekvatnih sadržaja, nažalost najveći dio svog slobodnog vremena provede u kafićima. Zbog toga ćemo narednih dana organizirati sličnu akciju i na uređenju izletišta na lokalitetu bivših vojnih baraka na planini Majevidi, na kojem ćemo krajem maja upriličiti rock koncert i druženje mladih», ističe Mirza Čidić, predsjednik NVO «Link» Srebrenik. Realizaciju projekta uređenja gradskog parka finansijski su pomogli Općinski načelnik Osman Suljagić te nekoliko uglednih srebreničkih firmi.

## Održan treći po redu "Rock am Lipik"



*Sa nastupa srebreničke rock grupe "Rain"*

Dana 30.05.2009.godine u organizaciji grupe građana u saradnji sa NVO "Link" i LD "Majevidica" Srebrenik, održan je treći po redu „Rock am Lipik“. Uprkos ekstremno lošim vremenskim uslovima, kiši koja je padala u nekoliko navrata, temperaturi koja je u jednom trenutku iznosila samo 6°C, sada već tradicionalni festival u planinskom ambijentu okupio je oko 200 ljubitelja muzike i prirode. Nova lokacija, „Donja kasarna – Barake“ ispod samog vrha „Okresanica“ na Majevidi, se pokazala kao pun pogodak. Dobar prilaz i veliki broj mjesta za parking, a u neko toplije vrijeme i neograničene kamp mogućnosti, aduti su koji dugoročno vežu „Rock am Lipik“ za ovaj lokalitet. Veliki broj prisutnih je izrazio oduševljenje odabirom lokacije i mogućnostima koje prostor nekadašnje kasarne nudi. Festival je započeo u 18 sati odličnim nastupom najmladeg srebreničkog rock sastava „Rain“. Publika se zagrijala zvucima domaćeg rocka, da bi se potom na sceni smjenjivali bendovi „Srebrni“, „Paranoica“, „Mamograf“ i „Generacija bez kompas“, u pojačanoj „festivalskoj“ postavi. Rock am Lipik je otvorena scena bez ograničenja, te su se bendovi nakon prvog bloka međusobno miješali, pomagali i upotpunjavali, poklonivši publici 8 nezaboravnih sati muzike uživo. Posebno raduje i najava nekadašnjeg gitariste najstarijeg srebreničkog rock sastava „Bedem“ Fikreta Mulahasanovića, da će za sljedeću godinu ponovo okupiti ovu grupu. Organizatori ove manifestacije se zahvaljuju svima bez kojih ovogodišnji „Rock am Lipik“ ne bi bio moguć.



*Nastup grupe "Mamograf"*

## OBRAZOVANJE

### MSS Srebrenik proslavila 32. rođendan

JU «Mješovita srednja škola» Srebrenik, tokom ove sedmice je u «Centru za kulturu i informisanje» Srebrenik, proslavila 32 godine uspješnog rada i obrazovanja mladih ljudi. Prisjećajući se davne 1977. godine kada je ovu ustanovu pohađalo 666 učenika koji su bili razvrstani u 18 odjeljenja, sa šest stalno uposlenih profesora i 30 spoljnih saradnika,



*Detalj sa godišnjice MSS Srebrenik*

direktor Mirsad Mušić, ukratko je ispričao historijat ove obrazovne ustanove. – Danas, nakon 32 godine, ovu školu pohađa 1840 učenika razvrstanih u 60 odjeljenja. Imamo 120 uposlenika bez ijednog spoljnog saradnika, a mnogi današnji profesori su nekada i pohađali ovu školu, istakao je direktor Mušić. Od 2003. godine u okviru ove škole započela je sa radom i Gimnazija, a samo u zadnjih četiri-pet godina u adaptaciju i proširenje «MSS» investirano je blizu milion maraka, dok je više od 300.000 KM investirano iz vlastitih sredstava. Ovu proslavu je uvećao i Faruk Vikalo, ministar za rad i socijalnu politiku u Vladi TK.

### Proslavljene godišnjice OŠ

Kraj školske godine obilježen je svečano u svim osnovnim školama na ovom općinskom području. Uposlenicima i učenicima na kraju školske godine, dodijeljena su priznanja za postignute uspjehe u nastavnim i vannastavnim aktivnostima uz obavezan bogat kulturno-zabavni program. Neke škole su se, pored uspjeha u nastavnim i vannastavnim aktivnostima, mogle pohvaliti i radovima na uređenju škole, dvorišta, izgradnji ili modernizaciji kotlovnica, sanaciji školskih dvorana isl. Takva situaciju smo zatekli u OŠ Špionica i Drugoj OŠ gdje se, zahvaljujući značajnim donacijama, kako općinske administracije i raznih donatora, tako i sa viših nivoa vlasti, uspjelo u značajnoj mjeri poboljšati uslove odvijanja nastave. Tako je pri kraju dovršetak sportske sale kod Druge osnovne škole, jednog veoma modernog i skupog kompleksa, čije zvanično otvorenje slijedi uskoro, te



*Direktor Ibrić u obnovljenoj sali u Špionici*

ćemo o njemu više pisati naknadno, dok je u OŠ Špionica potpuno rekonstruisana postojeća sportska sala, u čiju su obnovu po 50.000 KM uložili Federalno i Kantonalno ministarstvo obrazovanje, nauke kulture i sporta. Kako ističe Senaid Ibrić, direktor ove OŠ, za 100.000 KM, saniran je krov, urađeno grijanje, postavljen je novi parket, zamijenjena kompletna stolarija te sanirani mokri čvorovi, tako da je to sada jedna od najboljih malih sala na području TK-a, čak znatno bolja nego što je bila 1974. godine, kada je sagrađena. U navedenim školama kao i nizu drugih (OŠ Tinja, Prva Osnovna škola, OŠ Duboki Potok, OŠ Rapatnica, OŠ Podorašje i OŠ Sladna) su zahvaljujući manjim donacijama građana i privrednih kolektiva uspjeli također popraviti stanje u pojedinim segmentima odvijanja nastave, tako da za ovaj angažman menadžment ovih ustanova zaslužuje najvišu ocjenu.

### Maturanti MSS prodefilovali Srebrenikom



U skladu sa tradicijom, koja traje već nekoliko godina, i ove godine su ulicama Srebrenika, prodefilovali maturanti Mješovite srednje škole Srebrenik. Praćeni od strane oko hiljadu Srebreničana, visoko uzdignuta čela, dostojanstvenim hodom i u prelijepim haljinama i odijelima, predvođeni svojim razrednim starješinama, nastupali su srebrenički maturanti. Nakon svečanog defilea ulicama grada maturanti su, do duboko u noć, nastavili prigodno druženje u Motelu «Park» odn. u SRC Srebrenik, uz bogatu trpezu i prigodni muzički program.

## KLUB USPJEŠNIH

### Irma Hadžić prva u FBiH i sedma u BiH iz matematike za VII razrede

Hadžić Irma, kći Nedima i Ljiljane, rođena je 22.08.1995.godine. Od samog početka školovanja u Dugoj osnovnoj školi Srebrenik, postizala je odlične rezultate kako u učenju tako i u vladanju. Posebnu nadarenost i sklonost je pokazala prema matematici, što potvrđuju sljedeći rezultati iz Matematike: u VI razredu 1. mjesto na općinskom takmičenju i 3. mjesto na kantonalnom takmičenju, dok je ove godine briljirala,



*Irma Hadžić sa direktorom Hozić Emirom i nastavnicom matematike Zahirović Mirelom*

osvojivši u kategoriji VII razreda prva mjesta na općinskom, kantonalnom i federalnom takmičenju iz matematike, koje je sredinom maja 2009.godine održano u prostorijama Druge osnovne škole Srebrenik. Tu se nije završio pobjedonosni i izuzetno uspješni hod ove, na prvi pogled, mirne i tihe djevojke, koja «eksplođira» i pokaže svoje pravo lice tamo gdje je najpotrebnije, na takmičenju, tako da je i na Maloj olimpijadi, svojevrsnom državnim takmičenju iz matematike, koje se krajem maja 2009.g. održalo u Vitezu, ušla među 10 najboljih matematičara u BiH. Uspjeh je tim veći obzirom da se Irma jedina od učenika VII razreda uspjela ovako visoko plasirati, te da su zadaci uglavnom bili iz nastavnog gradiva srednje škole. Za ovaj uspjeh osim same Irme i njenih roditelja najzaslužnija je njena nastavnica matematike Zahirović Mirela, te menadžment škole predvođen direktorom Hozić Emirom, koji su obezbijedili sve potrebne preduslove za ovakve rezultate, tako da je ovaj uspjeh kontinuitet uspjeha koje ova škola godinama postiže posebno na planu predmeta iz prirodnih nauka (matematika, fizika, hemija, biologija...), dok su znatno popravljani rezultati i na sportskom planu, a za nadati se da će isti biti dosta bolji skorašnjim puštanjem u funkciju moderne sportske sale. Za postignuti uspjeh OV-e Srebrenik će na svečanoj sjednici Irmi Hadžić dodijeliti novčanu nagradu u iznosu od 500KM.

### Omerović Admir-učenik generacije MSŠ Srebrenik



Omerović Admir je rođen 10.02.1990.godine u Tuzli. Od samog početka školovanja u Osnovnoj školi Rapatnica, postizao je odlične rezultate kako u učenju tako i u vladanju. Od petog razreda je aktivan član brojnih sekcija i dodatnih nastava a posebnu nadarenost i sklonost je pokazivao prema matematici i fizici, što potvrđuju sljedeći rezultati iz Matematike: 2. mjesto u V razredu općinsko takmičenje; 3. mjesto u VII razredu općinsko takmičenje, 5. mjesto na kantonalnom takmičenju te 10. mjesto u FBiH i BiH; i 3. mjesto u VIII razredu općinsko takmičenje; te Fizike: 2. mjesto u VII razredu općinsko takmičenje. Iako nije proglašen za učenika generacije OŠ Rapatnica, to ga nije omelo da izuzetno uspješno nastavi školovanje i u Ekonomskoj školi MSŠ Srebrenik. I tu je nastavio sa odličnim učenjem i vladanjem, te postizanjem brojnih uspjeha u matematici: 9. mjesto u I razredu na kantonalnom takmičenju i 10. mjesto na federalnom takmičenju; 2. mjesto u III razredu na kantonalnom takmičenju iz Matematike, dok je najveći uspjeh doživio 16. maja 2009.g. u Brčko DC, gdje je na I Festivalu rada srednjih tehničkih i stručnih škola BiH, iz predmeta knjigovodstvo zauzeo 2. mjesto u državi. Prema vlastitoj izjavi namjerava upisati Ekonomski fakultet u Tuzli, a obzirom na sve gore navedeno uopće ne sumnjamo da će ovaj fakultet, Omerović Admir-učenik generacije MSŠ Srebrenik u školskoj 2008/2009.godini, završiti u roku i sa visokom prosječnom ocjenom. Uz iskrene čestitke za postignuti uspjeh napominjemo da će i Omerovića nagraditi Općinsko vijeće Srebrenik, koje će mu na svečanoj sjednici, povodom 21. juna - Dana općine Srebrenik, dodijeliti novčanu nagradu u iznosu od 500KM.

## PANORAMA

### Odata počast šehidima iz Gornjeg Srebrenika

U prisustvu brojnih mještana, porodica šehida i predstavnika Općine Srebrenik i srebreničkih boračkih udruženja, dana 26.04.2009.godine u MZ



*Položeno je cvijeće i proučena fatiha na spomen-obilježje šehidima u G. Srebreniku*

Gornji Srebrenik, učenjem fatihe na obnovljenom spomen-obilježju odata je počast 11-orici šehida iz ovog naselja. U obnovu spomenika uloženo je prošle godine 11.500 KM, a sredstva su zajednički osigurali Općina Srebrenik, MZ Gornji Srebrenik i pojedini donatori. Nakon toga položeno je cvijeće i na mezarje šehida iz ovog naselja. U sklopu obilježavanja ovog



*Ekipa Italijana, gostiju Beganović Avde*

datuma održan je i 3. tradicionalni turnir u fudbalu, na kojem je učestvovalo 28 ekipa, a među njima i ekipa sastavljena od naših radnika u Sloveniji te ekipa Italijana, koji su bili gosti Beganović Avde, koji živi i radi u Đenovi, R. Italija, i koji je jedan od suosnivača F.K. Bukovik.. Pobjednik ovogodišnjeg turnira je ekipa naših radnika u Sloveniji, koja je u finalnoj, veoma zanimljivoj utakmici, pobijedila ekipu FK Bukovik. Dan prije odigrana je revijalna utakmica između veterana Bukovika i Partizana.



*Učesnici revijalne utakmice FK Bukovik-FK Partizan*

### Održani sportski mektebski susreti

Novo naselje Luka bilo je domaćin «Sportskih mektebskih susreta» Medžlisa Islamske zajednice Srebrenik, a najviše znanja u nogometu, odbojci i atletici pokazao je džemat Lisovići, na drugom mjestu je Špionica a treći Potpeć. Na ovim susretima učestvovalo je svih 40 džemata Medžlisa Islamske zajednice Srebrenik i to sa više od 1.500 takmičara. Sportske susrete otvorio je predsjednik Izvršnog odbora Medžlisa Islamske zajednice Srebrenik,



*Pobjednički džemat Lisovići*

Mevludin efendija Joldić, rekavši tom prilikom «da su ovi susreti organizovani prije svega zbog sticanja novih prijateljstava kao i motivacija za polaznike mektebske nastave, kako bi bili što redovniji na mektebskoj nastavi». Najuspješnija ekipa je dobila pobjednički bajrak, a najbolji timovi po sportskim disciplinama pehare i diplome, dok su osvajači drugih i trećih mjesta dobili posebna priznanja. «Sportske mektebske susrete» su uspješno organizovali svi imami MIZ Srebrenik, dok su organizaciju ovih sportskih



susreta pripremili Vjersko-prosvjetna komisija MIZ Srebrenik u sastavu: Mevludin ef.Joldić, Jasmin ef.Begunić, Refik ef.Hodžić i Abdulah ef.Arifović.

## HUMANOST

### Sedmočlanoj porodici borci grade novi dom



*Porodica Mulahmetović*

Enver Mulahmetović, nezaposleni demobilisani borac iz srebreničkog naselja D. Srebrenik, zajedno sa majkom, suprugom i četvero djece uskoro bi se iz trošne kuće trebao useliti u novi stambeni objekt. Inicijativu za izgradnju kuće porodici Mulahmetović pokrenulo je Udruženje demobilisanih boraca Srebrenik, a na prvu akciju na izgradnji temelja okupilo se oko 20 mještana i njegovih bivših saboraca iz 211. oslobodilačke brigade. Građevinska firma "Osmo", čiji je vlasnik Osmo Mujačević, predsjednik Skupštine UDB-a Srebrenik, besplatno će

#### Dio šireg projekta

Kako kaže Bajro Imširović, predsjednik UDB-a Srebrenik, izgradnja kuće porodici Mulahmetović sastavni je dio šireg projekta kojim se želi pomoći demobilisanim borcima, koji do sada nisu bili u mogućnosti koristiti bespovratna sredstva Vlade TK-a.

obaviti sve građevinske radove, a donacijama u novcu i građevinskom materijalu u ovu akciju su se uključile i brojne firme i pojedinci. – Kao pripadnik Inter-

ventno-diverzantske čete 211. oslobodilačke brigade Srebrenik cijeli rat proveo sam na prvim borbenim linijama. Nažalost, već godinama sam bez stalnog zaposlenja, a skromna zarada od povremenih poslova nije dovoljna ni za prehranjivanje porodice, tako da nisam mogao ni sanjati o početku izgradnje nove kuće. Zbog toga sam zahvalan Udruženju i mojim bivšim saborcima što su me se sjetili i pokrenuli akciju-ističe Mulahmetović. Dio sredstava izdvojit će i UDB i Općina Srebrenik, tako da bi useljenje trebalo biti do jeseni.

### Nova humana akcija Crvenog krsta Srebrenik

Mladi volonteri Crvenog krsta Srebrenik nedavno su, na posebnoj štandu u centru Srebrenika, organizirali prodaju raznih vrsta plišanih dječijih igračaka po simboličnoj cijeni od 1 KM. Igračke je donirao Crveni



*Detalj sa prodaje igrački*

krst Švicarske, a prikupljena sredstva upotrijebit će se za kupovinu prehrambenih paketa bolesnim, starim i iznemoglim osobama na području srebreničke općine. U okviru humane akcije Nedjelja Crvenog krsta, istog dana su članovi Foruma mladih ove humanitarne organizacije, na posebnim štandovima u gradu, ali i u svim osnovnim i srednjim školama, organizirali i prodaju markica solidarnosti. Sredstva prikupljena prodajom markica upotrijebit će se za finasiranje raznih humanitarnih projekata Crvenog krsta Srebrenik.

### Deset srebreničkih invalida dobilo invalidska kolica



*Detalj sa dodjele kolica Jerković Mariu*

Dana 29.04.2009.godine, u prostorijama Crvenog krsta općine Srebrenik, upriličena je skromna svečanost na kojoj je 10 invalidnih osoba, sa područja naše Općine, dobilo nova invalidska kolica. Kako su tom prilikom istakli Faketa Ibrić, sekretar Crvenog križa Srebrenik

#### Dobitnici invalidskih kolica

Invalidska kolica su dobili civilni invalidi: Avdić Began, Cikarić Nermina, Delić Mujo, Salkić Adila, Okić Osman, Jerković Mario i Hasanović Ruhija, te ratni vojni invalidi: Bajrić Sead, Mehmedović Avdija i Glotić Izet.

i Smail Joldić, direktor JU «Centar za socijalni rad» Srebrenik, radi se o donaciji vrijednoj oko 8000 KM, koju je putem organizacije «Crkva Isusa Hrista» iz SAD-a obezbijedio Crveni krst Tuzlanskog kanona, dok su ove dvije naše organizacije vodile aktivnosti na odabiru korisnika ortopedskih pomagala – invalidskih kolica.



*Neki od dobitnika invalidskih kolica*

## PANORAMA

### U Srebreniku održana "Kotličijada"

U organizaciji Planinarskog društva «Majeвица», dana 10.04.2009.godine, ispred platoa «Sportsko-rekreativnog centra» Srebrenik, održana je «Kotličijada», a prema ocjeni petočlanog Stručnog



**Vahid Jašarević: Najbolje pripremio kotlić**

žirija, za pobjednika je izabran Vahid Jašarević-Guga. Na drugom mjestu je poznati srebrenički prodavač košpica Nihad Kešetović-Nita, dok je treće mjesto pripalo Planinarskom društvu «Majeвица», a za najbolje pripremljeni fiš paprikaš izabrana je ekipa Udruženja građana Sportsko-ribolovno društvo «Srebrenik». Stručni žiri su sačinjavali Ibrahim Smajlović kao predsjednik, inače stručni savjetnik za infrastrukturu i razvoj u Općini Srebrenik, te članovi Mato Jurić, vlasnik motela i Sportsko rekreativnog centra «Orion» Denis Kaltić, novinar na NTV «Jata», Izet Džanić, vlasnik firme «Hidromont» te Senaid Nurkanović, vlasnik motela «Evropa». Organizator je podijelio i zahvalnice Sportsko-ribolovnom društvu «Srebrenik», zatim Planinarskom društvu «Majeвица», te Nihadu Kešetoviću i Vahidu Jašareviću.

### Povratnicima Srbima pomoć u proljetnoj pripremi voćnjaka

U okviru projekta «Protiv diskriminacije manjinskih povratnika u procesu zapošljavanja i ostvarivanja prava na zdravstvenu zaštitu», u voćnjaku Milorada Blagića u Donjem Potpeću kod Srebrenika, održana je stručna radionica pod nazivom «Proljetna priprema voćnjaka». Predavač dipl. ing. poljoprivrede Suad Selimović iz Tuzle, povratnicima srpske nacionalnosti u Potpeć, praktično je prezentirao rezidbu šljive i pružio niz korisnih informacija o proljetnoj pripremi voćnjaka. Prema riječima Milorada Blagića, koji se prije desetak godina među prvima vratio u Donji

Potpeć, uz finansijsku podršku Evropske komisije, ovaj projekt se realizira već 18 mjeseci. U saradnji s Crvenim krstom Tuzlanskog kantona i Udruženjem mreža trenera, u proteklom periodu povratnicima je održano oko 20 predavanja. Uz primarnu poljoprivrednu proizvodnju, na tim predavanjima bilo je



**Prisutnima je praktično prezentirana rezidba šljive** riječi i o zdravstveno-socijalnim problemima povratnika i mogućnostima pokretanja porodičnog biznisa. Sve ovo, ističe Blagić, ima za cilj stimulisanje povratka, ali i stvaranje preduslova za održiv ostanak srpskih povratnika na njihovim ognjištima u D. i G. Potpeću. Zaključak svih sudionika je da je projekat uspješan, ali da se na ovome ne treba stati, nego uz finansijsku pomoć Općine Srebrenik i Vlade Tuzlanskog kantona pokušati realizovati naučeno.

### Bikovi iz Srebrenika najbolji

Nizom manifestacija i svečanosti obilježena je šesta godišnjica postojanja i rada Kluba uzgajivača i ljubitelja bosanskog bika «Gradina» Srebrenik. Nakon



svečane sjednice Skupštine ovog udruženja, održane 23.05.2009.g., na kojoj su zaslužnim pojedincima i kolektivima uručena priznanja i nagrade, upriličena je smotra folkloru, koncert izvorne i narodne muzike na otvorenom i pravo narodno veselje. U večernjim satima, u Sladni kod Srebrenika, održano je i tradicionalno natjecanje bosanskih bikova bodača, na kojem je nekoliko hiljada posjetilaca iz Srebrenika i okoline imalo priliku pogledati borbe bikova poznatih uzgajivača iz Čevljanovića, Olova, Kalesije, Srebrenika i dr. mjesta. Najviše uspjeha imali su uzgajivači bosanskih bikova Samir i Bešo Okić iz Sladne, čiji su bikovi pobijedili u 3 od ukupno 7 borbi.

## SPORT

## Nogometašima Bukovika općinski Kup



*Nogometaši Bukovika iz G. Srebrenika*

Nogometaši Bukovika iz G. Srebrenika, pobjednici su općinskog Kupa Srebrenik 2009. Oni su u finalnom susretu koji je odigran na Gradskom stadionu u Srebreniku dana 13.05.2009.g., savladali ekipu «Špionica 1953». Pehar kapitenu pobjedničke ekipe, uručio je izaslanik općinskog načelnika Esad Dedić.

## Karatistima Srebrenika osam medalja na prvenstvu BiH u Tuzli



Karatisti «Srebrenika» na 16. prvenstvu BiH održanom 16. i 17. maja 2009. u Tuzli, osvojili su 8 medalja. U konkurenciji 85 klubova sa 464 takmičara, karatisti «Srebrenika» predvođeni trenerom Mustafom Arifovićem, u grad soli su došli sa 13 takmičara. U kadetskoj konkurenciji medalje za KK. «Srebrenik» osvojili su: Amir Jašarević i Amir Arifović (bronzane medalje) te Egzon Osmanolaj (srebro). S druge strane u

juniorskoj konkurenciji u Srebrenik su odličja donijeli sljedeći karatisti: Dino Imširović (zlatno), Sabina Suljić (srebro) te Senaida Kenović, Ardanela Delibašić i Amir Arifović (bronzno). Važno je spomenuti kako je jedna od najboljih karatistkinja ovoga kluba i reprezentativka BiH, Arnela Salihbašić zbog povrede morala odustati uoči borbe za medalju.

## Mladi košarkaši OŠ Duboki Potok prvi, a košarkašice OŠ Rapatnice druge na Tuzlanskom kantonu



*Učenici OŠ Duboki Potok-prvaci TK*

Na općinskom takmičenju osnovnih škola, koje je 16. jula održano u «Sportsko-rekreativnom centru» Srebrenik, osnovci iz Dubokog Potoka pokazali su najviše, te su sasvim zaslužno ponijeli epitet najbolje ekipe. U dramatičnom finalu ekipa OŠ «Duboki Potok» predvođena profesorom tjelesnog i zdravstvenog odgoja Edisom Bajraktarevićem, inače trenerom K.K. «Gradina» Srebrenik, bila je bolja od ekipe «II OŠ Srebrenik» koju su savladali sa 26:24, plasiravši se time na kantonalno takmičenje. Sredinom maja 2009.g., u sportskoj dvorani u Banovićima, održano je takmičenje učenika osnovnih škola s područja Tuzlanskog kantona u košarci, na kojem su srebrenički osnovci ostvarili značajan uspjeh. Muška ekipa Osnovne škole Duboki Potok, osvojila je prvo mjesto, na drugom mjestu je Osnovna škola Sapna, dok je treću poziciju izborila Osnovna škola Kalesija. U konkurenciji djevojčica najbolja je bila ekipa Osnovne škole Banovići, na drugom mjestu je Osnovna škola Rapatnica, dok je treću poziciju izborila Osnovna škola Sapna. Najuspješnijim ekipama i pojedincima uručene su diplome i pehari, a pobjednici u obje kategorije izborili su i pravo nastupa na Malim olimpijskim igrama, predstojećem državnom takmičenju u Sarajevu. Čestitamo našim mladim košarkašima i košarkašicama, na ovom velikom uspjehu, sa željom da ponove prošlogodišnji uspjeh učenika Prve osnovne škole Srebrenik.

## KOLAŽ

# Izabrano najljepše dvorište, poslovni krug, javna površina...



*Dvorište Husić Alije iz Čehaja*

Općina Srebrenik je i ove godine pokrenula veliku proljetnu akciju na uređenju grada i naseljenih mjesta na području općine. U sklopu proljetne akcije na uređenju grada, u saradnji s Ekološkim društvom «Eko-zeleni» Srebrenik, organizovan je i tradicionalni izbor najuređenijeg školskog dvorišta, poslovnog kruga, dvorišta, individualnih stambenih objekata i najuređenijeg balkona u 2009. godini. Proglašenje pob-



*Dvorište OŠ Tinja*

jednika ovog svojevrsnog ekološkog takmičenja i dodjela nagrada, vlasnicima najbolje uređenih dvorišta i poslovnih krugova, upriličeno je 04.06.2009. g. u Plavoj sali Doma kulture u Srebreniku, na prigodnoj svečanosti, koja je organizovana povodom 5. juna, Međunarodnog dana zaštite čovjekove okoline. Prigodnim programom predstavili su se članovi Eko-sekcije MSS Srebrenik, a prisutnima su se, obratili



*Uređena javna površina u C. Srebrenika*

Osman Gavranović, predsjednik Eko-zelenih Srebrenik, prof. dr, Edin Mutapčić te Esad Dedić, ispred općine Srebrenik, koji su istakli značaj ovog datuma te pojasnili koliko lični doprinos građana, kroz uređenje vrtova, balkona, javnih površina, dvorišta škola i preduzeća može pomoći u stvaranju ljepše i zdravije životne okoline. Diplome i nagrade u iznosu od 100KM za najuređenije porodično dvorište dobili su Husić Alija iz Čehaja i Tursunović Samida iz G. Tinje, diplomu i nagradu od 150KM za školsko dvorište OŠ Tinja, dok je zbog nedostatka konkurencije nagrada od 50KM, umjesto za najbolji balkon, dodijeljena Ibrić Enesu zv. Enta za uređenje javne površine. Diplome za najuređeniji poslovni krug su dobile firme «Murex» d.o.o. Špionica i «PTT Srebrenik», dok su MSS Srebrenik, Ingram, OŠ D. Potok te Avdić Rasim, Abdulahović Hasiba i Okić Ibrahim dobili pohvale.



*Dvorište Tursunović Samide iz Gornje Tinje*



*Poslovni krug «PTT»Srebrenik*